

**Duniyā  
kī  
Taḥlīq**



*duniyā kī taḥhlīq*

Creation

(Urdu—Roman script)

© 2022 Chashma Media.

*published and printed by*

Good Word Communication Services Pvt. Ltd.

New Delhi, INDIA


Bible text is from UGV.

illus.: <https://sweetpublishing.com>,

R. Gunther ([www.lambsongs.co.nz](http://www.lambsongs.co.nz))

*for enquiries or to request more copies:*

[askandanswer786@gmail.com](mailto:askandanswer786@gmail.com)




### **Duniyā kī Taḥlīq kā Pahlā Din: Raushnī**

Ibtidā meñ Allāh ne āsmān aur zamīn ko banāyā. Abhī tak zamīn wīrān aur ḵhālī thī. Wuh gahre pānī se ḍhakī huī thī jis ke ūpar andherā hī andherā thā. Allāh kā Rūh pānī ke ūpar manḍlā rahā thā.

Phir Allāh ne kahā, “Raushnī ho jāe” to raushnī paidā ho gaī.

Allāh ne dekhā ki raushnī achchhī hai, aur us ne raushnī ko tārikī se alag kar diyā. Allāh ne raushnī ko dīn kā nām diyā aur tārikī ko rāt kā.

Shām huī, phir subh. Yoñ pahlā dīn guzar gayā.



## **Dūsrā Din: Āsmān**

Allāh ne kahā, “Pānī ke darmiyān ek aisā guñbad paidā ho jāe jis se nichlā pānī ūpar ke pānī se alag ho jāe.” Aisā hī huā. Allāh ne ek aisā guñbad banāyā jis se nichlā pānī ūpar ke pānī se alag ho gayā. Allāh ne guñbad ko āsmān kā nām diyā.

Shām huī, phir subh. Yon dūsrā din guzar gayā.




### **Tīsrā Din: Ḳhushk Zamīn aur Paudhe**

Allāh ne kahā, “Jo pānī āsmān ke nīche hai wuh ek jagah jamā ho jāe tāki dūsarī taraf ḳhushk jagah nazar āe.” Aisā hī huā. Allāh ne ḳhushk jagah ko zamīn kā nām diyā aur jamāshudā pānī ko samundar kā.

**Aur Allāh ne dekhā ki yih achchhā hai.**

Phir us ne kahā, “Zamīn hariyāwal paidā kare, aise paudhe jo bīj rakhte hoñ aur aise daraḳht jin ke phal apnī apnī qism ke bīj rakhte hoñ.” Aisā hī huā. Zamīn ne hariyāwal paidā kī, aise paudhe jo



apnī apnī qism ke bīj rakhte aur aise daraḳht jinke phal apnī apnī qism ke bīj rakhte the.

**Allāh ne dekhā ki yih achchhā hai.**

Shām huī, phir subh. Yoñ tīsrā din guzar gayā.

### **Chauthā Din: Sūraj, Chānd aur Sitāre**

Allāh ne kahā, “Āsmān par raushniyāñ paidā ho jāeñ tāki din aur rāt meñ imtiyāz ho aur isī tarah muḳhtalif mausamoñ, dinoñ aur sāloñ meñ bhī. Āsmān kī yih raushniyāñ duniyā ko raushan kareñ.” Aisā hī huā. Allāh ne do baṛī raushniyāñ




banāin, sūraj jo baṛā thā din par hukūmat karne ko aur chānd jo chhoṭā thā rāt par. In ke alāwā us ne sitāroṅ ko bhī banāyā. Us ne unheñ āsmān par rakhā tāki wuh duniyā ko raushan kareñ, din aur rāt par hukūmat kareñ aur raushnī aur tārīkī meñ imtiyāz paidā kareñ.

**Allāh ne dekhā ki yih achchhā hai.**

Shām huī, phir subh. Yoñ chauthā din guzar gayā.

### **Pānchwān Din: Pānī aur Hawā ke Jāndār**

Allāh ne kahā, “Pānī ābī jāndāroṅ se bhar jāe aur fazā meñ parinde uṛte phireñ.” Allāh ne baṛe baṛe



samundarī jānwar banāe, pānī kī tamām dīgar maḡhlūqāt aur har qism ke par rakhne wāle jāndār bhī banāe.

**Allāh ne dekhā ki yih achchhā hai.**

Us ne unheñ barkat dī aur kahā, “Phalo-phūlo aur tādād meñ baḡhte jāo. Samundar tum se bhar jāe. Isī tarah parinde zamīn par tādād meñ baḡh jāeñ.”


Shām huī, phir subh. Yoñ pānchwāñ din guzar gayā.

## **Chhaṭā Din: Zamīn par Chalne Wāle Jānwar aur Insān**

Allāh ne kahā, “Zamīn har qism ke jāndār paidā kare: Maweshī, reṅgne wāle aur janglī jānwar.”  
Aisā hī huā.

Allāh ne har qism ke maweshī, reṅgne wāle aur janglī jānwar banāe.

Us ne dekhā ki yih achchhā hai.



## Sawāl

● *Allāh ne duniyā ko pahāron, bādalon, paudhon aur jāndāron samet kis ke wasīle se banāyā?*

► Us ne sab kuchh apne kalām ke wasīle se ḳhalaq kiyā. Us ne farmāyā ki wuh paidā ho jāe, aur wuh yakdam paidā huā. Jahān kuchh nahīn thā wahān wuh apne kalām se sab kuchh wujūd meñ lāyā.

Yoñ Hazrat Dāūd Bādshāh Zabūr meñ farmātā hai,

Zamīn aur jo kuchh us par hai Rab kā hai, duniyā aur us ke bāshinde usī ke haiñ. Kyonki us ne zamīn kī buniyād samundaron par rakhī aur use dariyāon par qāym kiyā.

(Zabūr 24:1-2)

Us ne farmāyā to fauran wujūd meñ āyā, us ne hukm diyā to usī waqt qāym huā. (Zabūr 33:9)

- *Jo kuchh Allāh Ta'ālā ne banāyā, wuh kaisā thā?*
  - ▶ Wuh bahut achchhā, nihāyat umdā aur shāndār thā. Ḳhudā ne sab kuchh achchhā aur ḳhūsūrat banāyā. Agar dhyān diyā jāe to itne beshumār qism ke jāndār aur paudhe is duniyā meñ hote haiñ ki insān hairān rah jātā hai. Sab se chhoṭā phūl rangārang aur sundar hotā hai, sab se chhoṭā parindā ajūbā hai. Yih dekhkar insān hakkā-bakkā rahkar ḳhāliq kī tamjīd kartā hai.






### **Insān kī Taḡhlīq**

Allāh ne kahā, “Āo ab ham insān ko apnī sūrat par banāen, wuh ham se mushābahat rakhe. Wuh tamām jānwaroñ par hukūmat kare, samundar kī machhliyoñ par, hawā ke parindoñ par, maweshiyoñ par, janglī jānwaroñ par aur zamīn par ke tamām reñgne wāle jāndāroñ par.”

Phir Rab Ḳhudā ne zamīn se miṭṭī lekar insān ko tashkīl diyā aur us ke nathnoñ meñ zindagī kā dam phūnkā to wuh jīti jān huā.

## Ādam aur Hawwā Bāgh-e-Adan meñ





Rab ẖhudā ne mashriq meñ Mulk-e-Adan meñ ek bāgh lagāyā. Us meñ us ne us ādmī ko rakhā jise us ne banāyā thā. Rab ẖhudā ke hukm par zamīn meñ se tarah tarah ke daraḡht phūṡ nikle, aise daraḡht jo dekhne meñ dilkash aur khāne ke lie achchhe the. Bāgh ke bīch meñ do daraḡht the. Ek kā phal zindagī baḡhshtā thā jabki dūsre kā phal achchhe aur bure kī pahchān dilātā thā. Adan meñ se ek dariyā nikalkar bāgh kī ābpāshī kartā thā.

Rab ẖhudā ne pahle ādmī ko Bāgh-e-Adan meñ rakhā tāki wuh us kī bāghbānī aur hifāzat kare.

Rab ẖhudā ne kahā, “Achchhā nahīn ki ādmī akelā rahe. Maiñ us ke lie ek munāsib madadgār banātā hūñ.”

Rab ẖhudā ne miṡṡī se zamīn par chalne-phirne wāle jānwar aur hawā ke parinde banāe the. Ab wuh unheñ ādmī ke pās le āyā tāki mālūm ho jāe ki wuh un ke kyā kyā nām rakhegā. Yoñ har jānwar ko Ādam kī taraf se nām mil gayā. Ādmī ne tamām



maweshiyon, parindon aur zamīn par phirne wāle jāndāron ke nām rakhe.

Lekin use apne lie koī munāsib madadgār na milā. Tab Rab Ḳhudā ne use sulā diyā. Jab wuh gahrī nīnd so rahā thā to us ne us kī pasliyon meñ se ek nikālkar us kī jagah gosht bhar diyā. Pasli se us ne aurat banāi aur use ādmī ke pās le āyā.

Use dekhkar wuh pukār uṭhā, “Wāh! Yih to mujh jaisī hī hai, merī haḍḍiyon meñ se haḍḍī aur mere gosht meñ se gosht hai. Is kā nām Nārī rakhā jāe kyonki wuh nar se nikālī gai hai.”

Ādam ne apnī bīwī kā nām Hawwā yānī zindagī rakhā, kyonki bād meñ wuh tamām zindon kī māñ ban gai. Is lie mard apne māñ-bāp ko chhoṛkar apnī bīwī ke sāth paiwast ho jātā hai, aur wuh donoñ ek ho jāte haiñ. Donoñ, ādmī aur aurat nange the, lekin yih un ke lie sharm kā bāis nahīn thā.



Lekin Rab Ҷhudā ne use āgāh kiyā, “Tujhe har daraḡht kā phal khāne kī ijāzat hai. Lekin jis daraḡht kā phal achchhe aur bure kī pahchān dilātā hai us kā phal khānā manā hai. Agar use khāe to yaqīnan maregā.”

Yon Allāh ne insān ko apnī sūrat par banāyā, Allāh kī sūrat par. us ne unheñ mard aur aurat banāyā. Allāh ne unheñ barkat dī aur kahā, “Phalo-phūlo aur tādād meñ baḡhte jāo. Duniyā tum se bhar jāe aur tum us par iḡhtiyār rakho. Samundar kī machhliyon, hawā ke parindon aur zamīn par ke tamām reñgne wāle jāndāron par hukūmat karo.”

Allāh ne sab par nazar kī to dekhā ki wuh bahut achchhā ban gayā hai.

Shām huī, phir subh. Chhaṭā din guzar gayā.



### **Sātwān Din: Ārām**

Yoñ āsmān-o-zamīn aur un kī tamām chīzoñ kī taḥlīq mukammal huī. Sātweñ din Allāh kā sārā kām takmīl ko pahuñchā. Is se fāriḡh hokar us ne ārām kiyā. Allāh ne sātweñ din ko barkat dī aur use maḥsūs-o-muqaddas kiyā. Kyoñki us din us ne apne tamām taḥlīqī kām se fāriḡh hokar ārām kiyā.

**Yih āsmān-o-zamīn kī taḥlīq kā bayān hai.**

## Sawāl

- *Āḳhir meñ jab tamām jāndār aur paudhe paidā ho chuke the to Ḳhudā ne insān ko banāyā. Us ne use mard aur aurat kī sūrat meñ banāyā. Yih us kī marzī balki gahrī ḳhāhish thī ki ham wujūd meñ āen. Rab Ḳhudā ne zamīn se miṭṭī lekar insān ko tashkīl diyā aur us ke nathnoñ meñ zindagī kā dam phūnkā to wuh jītī jān huā. Ḳhudā ke dam yānī rūh se insān jīne lagā. Us ne hameñ kis sūrat par banāyā?*
- ▶ *Apnī sūrat par. Is se ham insānoñ ko Allāh kī taraf se ḳhās izzat hāsil huī hai. Yoñ Zabūr meñ likhā hai,*

To insān kaun hai ki tū use yād kare yā ādamzād ki tū us kā ḳhyāl rakhe? Tū ne use farishtoñ se kuchh hī kam banāyā, tū ne use jalāl aur izzat kā tāj pahnāyā. Tū ne use apne hāthoñ ke kāmoñ par muqarrar kiyā, sab kuchh us ke pāñwoñ ke nīche kar diyā. (Zabūr 8:4-6)

Is zabūr se mālūm hotā hai ki Allāh Ta'ālā ke lie har ek insān aham hai, wuh har ek kī qadr aur fikr kartā hai. Ek aur zabūr meñ likhā hai,

Ai Rab, insān kaun hai ki tū us kā khyāl rakhe? Ādamzād kaun hai ki tū us kā lihāz kare? (Zabūr 144:3)

Is baṛī izzat ke bāis Ḳhudā kī tamjīd ho.

Ai Rab hamāre āqā, pūrī duniyā meñ terā nām kitnā shāndār hai! (Zabūr 8:9)

- *Ḳhudā ne insān ke lie ek ālā qism kā bāgh lagāyā tāki us kī hifāzat kī jāe aur us kī zarūriyāt bhī pūrī ho jāen. Is bāgh kī ek bāt bahut khās thī. Wuh kyā?*
  - ▶ Wahān Hazrat Ādam aur Hawwā kā Ḳhudā ke sāth sīdhā aur barāh-e-rāst rābtā thā. Wahān unheñ na sirf har zarūrī chīz muhaiyā thī balki wuh barāh-e-rāst Ḳhudā ke sāth bāteñ kar sakte the.

- *Allāh Ta'ālā ne Hazrat Ādam ko kuchh zimmedāriyān bhī sauñpīn. Wuh kyā thīn?*
  - ▶ Ādam ko zamīn kī bāghbānī aur hifāzat karnī hai. Sāth sāth unheñ batāyā jātā hai ki wuh tamām jāndāron ko nām deñ.
- *Is meñ Hazrat Ādam kyā kirdār rakhte haiñ?*
  - ▶ Wuh zamīn par Allāh ke numāindā haiñ. Ḳhudā ke nazdīk ham us ke numāinde hone ke qābil haiñ. Jis tarah Ādam ko yih zimmedārī pūrī karne ke lie āzādī dī gaī usī tarah wuh hameñ bhī āzādī baḳhshtā hai. Yoñ Zabūr meñ likhā hai,

Tū ne use apne hāthoñ ke kāmoñ par muqarrar kiyā, sab kuchh us ke pāñwoñ ke nīche kar diyā, ḳhāh bheḱ-bakriyān hoñ ḳhāh gāy-bail, janglī jānwar, parinde, machhliyān yā samundarī rāhoñ par chalne wāle bāqī tamām jānwar.

(Zabūr 8:6-8)



- *Phir bhī jo kuchh Ādam karte hain us mein wuh Allāh ke sāmne zimmedār ṭhahrte hain. Is lie Ḳhudā ne unhen āzmāne ke lie ek ḳhās chīz bāgh mein lagāī. Wuh kyā thī?*
  - ▶ Ek ḳhās daraḳht jis kā phal khānā manā thā: Wuh daraḳht jis kā phal achchhe aur bure kī pahchān dilātā hai.
- *Ḳhudā Hazrat Ādam aur Hawwā ko barkat detā hai. Is kā kyā matlab hai?*
  - ▶ Allāh kī marzī hai ki insān ḳhushhāl rahe, ki us kī tamām zarūriyāt pūrī kī jāen. Lekin is se baḥkar wuh chāhtā hai ki insān kā ḳhāliq ke sāth achchhā rishtā ho. Shurū hī se wuh chāhtā hai ki insān us se rifāqat rakhe. Bāgh-e-Adan mein Hazrat Ādam aur Hawwā kī Allāh Ta'ālā ke sāth rifāqat achchhā aur gahrā thā.
 

Āj bhī haqīqī ḳhushhālī isī mein hotī hai ki ham Ḳhudā se achchhī rifāqat rakhen, ki koī gunāh is mein mudāḳhalat na kare. Taḳhlīq ke waqt sab kuchh achchhā aur kāmīl thā. Har tarah se salāmatī thī, aur insān Ḳhudā kī qurbat mein rahtā thā. Allāh Ta'ālā āj bhī chāhtā hai ki ham us kī qurbat hāsīl karen, ki hamārā us ke sāth rishtā bahāl

ho. Wuh hamārī rakhwālī karnā, hamārī zarūriyāt pūrī karnā chāhtā hai—is duniyā meñ hote waqt bhī aur maut ke bād bhī.

- *Sātweñ dīn Allāh ne ārām kiyā. Kyā wuh thak gayā thā? Kyā wuh thakā-hārā thā?*
  - ▶ Hargiz aisī koī bāt nahīn thī. Ḳhudā ne dekhā ki har chīz nihāyat umdā aur afzal hai. Kisī aur chīz kī zarūrat nahīn hai jise ḳhalaq karnā hai.
- *Kyā duniyā āj tak bhī isī tarah achchhī hai? Kyā āj tak hamārā Ḳhudā ke sāth aisā qarībī rishtā hai, aisī gahrī rifāqat hai? Kyā ham aur pūrī duniyā āj tak mukammal taur par achchhe haiñ?*
  - ▶ Beshak aisā nahīn hai. Bahut-sārī chīzen kamzor aur nāqis nazar ātī haiñ. Achchhe aur bure logon donoñ se burī harkateñ hotī rahtī haiñ.

**Yih kis tarah huā?**

**Kyā Allāh Ta'ālā yā us kī marzī badal gai?**

**Yā kyā ham insān badal gae?**